

**ՎԱՅՐԵՆԻ ՊԱՊՈՒԱՄՆԵՐԻ ԵՐԳԸ
ՖՐԱՆՍԻԱՅԻՆԵՐԻ ՎՐԱ: ԻԴԱՐԱ
ԲԱՆԱՍՏԵՂԾՈՒՀԻՆ ԵՐԳՈՒՄ Է ԵՂԵԳՆԻ
ԶԱՅՆԱԿՑՈՒԹՅԱՄԲ**
Երգ սիպտակմերի վրա

- Երբ մեծ նավերով սիպտակներն եկան,
Մենք ընդունեցինք մեր եղբարց նման:
Մեր հին ծառերը նրանք կտրեցին
Իրանց նավերը ափից կապեցին.
- 5 Բայց այդ ոչ մի բան չարժեր մեզ համար:
Նրանք, համայնքի պղնձումն ինչ կար,
Բոլոր հատիկը կերան < . . . >
Դրանով էլ էինք մենք դեռ բավական:
Բայց մեր լավ հողերն սկսեցին խլել,
- 10 Որ պտղում էին առանց հերկելու.
Ծառա շինեցին տղամարդ ու կին,
Ինչ որ ունեինք՝ ողջը խլեցին:
Նրանք մեզ երկինք-երկիր խոստացան,
Ու բացի վշտից չտվին այլ բան:
- 15 Մեր նավակները ուր կանգնած էին:
Բոլոր ծոցերը նրանք բռնեցին՝
Գետերի ափին — ծառի հովանում,

- Ուր մեր խրճիթներն էինք մենք [շինում],
 Նրանք շինեցին իրանց գյուղերը,
 20 Հափշտակեցին մեր հին տեղերը:
 Արդ՝ ոտքում են մեր դաշտն ու մեզ քամահրում:
 Մենք հնավանդի փայտով ենք փորում,
 Ուրիշ բան չունենք նրանից ավել,
 Եվ այդ էլ սակայն ուզում են խլել:
 25 Եվ անշուշտ նրանք անբախտ են եղել,
 Որ մեր համայնքի կողմերն են եկել
 Հեռու աշխարհից —
 Ծովի էն ափից.
 Սիպտակ մարդի՛կ, ի՞նչն է ձեզ քաշում,
 30 Ի՞նչ քամի է ձեզ մեր կողմը քըշում,
 Սև տենչանքներին զոհ ու կերակուր...
 Բայց թե հերիք չեն այդ բոլորը ձեզ,
 Ահա պոետի սիրտը վշտակեզ...
 35 * * * * *
 * * * * *
 * * * * *
 Եվ մի՞թե պիտի գեղեցիկ մի օր
 Ծովերը անցնեն ցեղերը բոլոր...
 Լո՛ւռ կաց, իմ սրինգ, յուր վըշտի վըրան
 40 Արդեն բավական խոսեց Իդարան: